



REBOLUSYONARYO A PAGIWARNAK TI UMILI ITI AMIANAN-LAUD A LUZON

DANGADANG


Marso - Abril 2020

Tawen 34 Bilang 2

P10.00

IPASA NO MABASA

Editorial



Ad-adda a papigsaen ti panagkaykaysa tapno labanan ti pandemya a Covid-19 ken ti pasismo ti rehimen

Nakaro a riribuk iti umili ti pandemya a Covid 19. Maysa daytoy a saan a kadawyan a pasamak a sangsanguen ti intero a lubong nga awan pay ti natakuan nga agas inggana itatta. Nangipaay daytoy ti dakkel a dislokasyon iti gagangay a taray ti panggimong a biag ti umili iti sangalubongan.

Iti rehiyon tayo, iti tengnga ti nalawa a community lockdown a militarista nga addang ti rehimen nga US-Duterte, inannatupan tayo ti nayon a kinarigat a resulta ti nasao a kasasaad tapno tarabayan ti rebolusyonaryo nga umili iti maymaysa a panaglaban iti pandemya. Nangirussuat tayo kadagiti kampanya iti impormasyon, pangmasa a klinika ken panagsanay medikal para kadagiti grupo iti salun-at dagiti ROM kadagiti barangay. Ginasut a masa ti dimmar-ay kadagiti panagtitipon, aktibo a makitungtong ken nagkaykaysa kadagiti aramiden nga addang no kasano a kontrolen ken liklikan ti

COVID iti komunidad da.

Nairut a simmurot ti rebolusyonaryo a tignayan iti unilateral ceasefire nga atas ti Komite Sentral ti Partido Komunista ti Pilipinas tapno ikkan ti kangatuan a prayoridad ti panaglaban iti Covid-19. Numampay kurang ken adda ladaw na, nasayaat a naiwanwan ti panangidanon dagiti tulong a relief ti LGU ken dadduma pay a grupo para iti umili lalo kadagiti nasulineka a lugar.

Iti dadduma a lugar iti Cordillera, daydayawen (kapuri-puri) ti panangirupir dagiti LGU ken dagiti lokal a sibilyan a residente nga isuda ti agbantay kadagiti naitakder a checkpoint imbes a dagiti militar ken pulis. Iti kastoy a kasasaad, maisigurado da ti kinatalged ti umili gapu ta ammo da ti papanan ken paggapuan ken dagiti tattao a rumrumuar ken sumsumrek iti lugar. Babaen iti agtitimpuyog a panangikagumaan, nakaaramid da kadagiti face mask ken nakaurnong kadagiti kasapulan

a disinfectant para kadagiti volunteer.

Tapno malabanan ti bisin a resulta ti lockdown, ad-adda a naparegta ti tinnulong iti panagtrabaho kadagiti talon. Indauloan dagiti lider ti PKM ti agtitimpuyog a panagdalus ken panagmula ti pagay ken dadduma pay a mula a taraon. nasaknap a naibingayti siyentipikoken organiko a wagas iti panangipangato ti apit manipud iti positibo a kapadasan ti sumagmamano a kameng ti PKM a nakaapit ti 54 a sako ti pagay manipud iti dati a 20 a sako iti 11 a kelleng a masuksukay a daga. Naiduron met laeng ti panagpaadu kadagiti taraken a dinguen ken panagmula ti prutas, nateng ken mula a herbal. Aktibo met a pumaset ti hukbo iti panagtitimpuyog iti panagmula ken panagapit

Awan namnamaen a pudno nga ayuda ti umili a madidigra ti Covid manipud iti pasista a rehimen a US-Duterte. Inutil daytoy iti panangsango iti krisis iti salun-at,

a paset ti krisis ti malunglungsot a malapyudal ken malakolonyal a gimong nga iturturayan da. Bassit ti pondo a nailatang para iti pangpubliko a salun-at, isu a ranggas ti aramaten a saan a tapno labanan ti virus no di ket tapno paulimeken ti agrigrigat nga umili. Napaay ti rehimen a lappedan ti panagwaras ti Covid-19. Agtultuloy a ngumatngato ti bilang dagiti naakaran ken natay iti intero a pagilian.

Imbes a risuten ti danag dagiti mannalon iti kaaw-awayan, ad-adda a napakaro ti pammutbuteng ti militar ken pulis. Agtultuloy ti operasyon ti militar iti lima a probinsya, 19 a munisipyo ken 58 a baryo iti rehiyon uray pay no indeklara ti rehimen ti bukod a unilateral ceasefire. Duapulo a barangay iti uppat a munisipyo ti Kalinga ti sawsawaren dagiti tropa ti 50th IB ken PNP. Iti Abra, 24 a barangay iti pito nga ili ti operasyonen ti 24th IB, 81st IB ken PNP. Iti Mountain Province, siyam



a barangay iti uppat nga ili ti nag-operasyon ti 54th IB ken PNP, bayat nga iti Ilocos Sur ket pito a barangay iti uppat a munisipyo ti nag-operasyon ti 81st IB.

Sobra a pananglipit ti maar-aramid kadagiti naitakder a lockdown checkpoint ti pulis ken militar. Marikisa ti amin nga aglabas a masa ken dagiti awit da, kagiddan ti agsasaruno a panagsaludsud nga aglanglanga nga interrogasyon. Kadagiti baryo a nagpuestoan ti kabusor, naparitan dagiti mannalon a mapan kadagiti talon ken pagpastroan. Saan a sarsardengan dagiti korap nga opisyal ti AFP ken PNP ti kampanya iti panagpasurender. Namin-ano a daras a nangipatayab daytoy ti helicopter iti sumagmamano a baryo ti Mountain Province ken Abra tapno mangitinnag kadagiti polyeto ti panagpasurender. Adda met laeng ti inaramid ti 24th IB a pammarang a panangiwaras ti maregmeg a relief babaen kadagiti helicopter kagiddan

ti panangpatayab kadagiti surveillance plane. Dakdakkal pay ti gasto para iti gasolina dagitoy a helicopter ken surveillance plane ngem iti naited iti umili. Nalawag a ti dakkal a badyet militar a mausar koma iti panagtulong iti naruy nga umili a naapektaran iti pandemya ket gasgastosen laeng ti rehimen tapno ipatungpal ti ubbaw nga arapaap a rebeken ti rebolusyonaryo a tignayan sakbay nga aggibus ti termino na.

Inaklon mismo ti rehimen a ti mala-martial law a total lockdown ken community quarantine ket nagresulta iti panagsuwek ti ekonomiya. Minilmilyon nga umili ti naawanan ti pagbiagan wenna saanen a makatrabaho ken agsanggir laengen iti napnuan iti korapsyon a nagbassitan a tulong ti reaksyunaryo a gubyerno a social amelioration fund. Ti panagsuwek ti ekonomiya ket nayon a mangparparigat ken ad-adda a mangrubrob iti pungtot ti umili. Ad-adda a pairtengen ti daytoy a kasasaad ti panagkalikagum ti umili a maidadanes ken magungundawayan para iti pudno a panggimong a panagbalbaliw.

Namnaen tayo ti panaggil-ayab dagiti naiirteng a laban kadagiti sumarsaruno nga aldaw. Kasapulan nga agsagana ti intero a rebolusyonaryo nga intar para ditoy. Ad-adda a papigsaen ti panagkaykaysa ken panagsanggir iti organisado a pigsa tayo, saan laeng a para iti panaglapan iti Covid-19 no di para iti panangiyabante ti naindasigan nga interes ti umili laban kadagiti dasig a mananggundaway ken manangidadanes. Determinado nga iyabante tayo ti pannakidangadang dagiti mannalon para iti pudno a reporma iti daga ken panaglapan iti nadumaduma a tipo ti pyudal ken malapyudal a panaggundaway bayat nga iyab- abante dagiti tignayan masa para

 <p>Ti <i>Dangadang</i> ket rebolusyonaryo a pagiwarnak iti Amianan-Laud a Luzon iti tarabay ti PARTIDO KOMUNISTA ti PILIPINAS. Maipablaak ditoy dagiti damdamag kadagiti aksyon ti Bagong Hukbong Bayan ken dangadang ti umili kasta met ti panagamiris kadagiti isyu a pakaseknan ti umili.</p> <p>Silulukat ti <i>Dangadang</i> iti aniaman a saludsod, dillaw, singasing, koresponsal ken pangkultura a parnuay tapno mapadur-as ti linaon na.</p> <p>Pagtitinnulongan tayo a padur-asen ti <i>Dangadang</i>. Ti sangapulo a piso a presyo ti pagiwarnak ket dakkal a tulong tapno suportaran ti agtultuloy a pannakairuar na.</p>	<p>ITI DAYTOY NGA ISYU:</p>  <p>Editoryal :</p> <p>Labanan ti Agtultuloy nga imperyalista nga Agresyon 1</p> <p>Panaglabsing ti militar iti ceasefire agtultuloy 3</p> <p>Ti Covid-19 lockdown ken ti panagtignay ti umili 4</p> <p>Pannakamulat ken pannakilaban ti mangmanged a kababaihan. . .7</p> <p>Kampanya a panagpasurender ti militar kunkondenaren ti umili. . 8</p> <p>Ti anibersaryo ti CPDF 9</p> <p>Seksyon medikal:</p> <p>COVID-19 10</p> <p>Dagiti Pablaak ken ni:</p> <p>Ka Julius Giron 12</p> <p>Kultura:</p> <p>Kasasaad iti COVID. 16</p>
---	---

iti panangpadur-as iti produksyon ti taraon. Paayen ti Oplan Kapanatagan ti rehimen nga US-Duterte babaen iti nainget a panangiyabante ti nailian demokratiko a rebolusyon. Iti panagballigi laeng ti DRB ken panagdaliasat iti sosyalista a dalan a magun-od tayo

ti pudno a panggimong a panagbalbaliw. Iti uneg laeng ti baro a sosyalista a sistema kalpasan a marebbek ti malapyudal ken malakolonyal a sistema a malakam ti umili ti pudno a serbisyo iti salun-at ken amin a panggimong a serbisyo. ✎

Panaglabsing ti militar iti ceasefire, agtultuloy

Iti kinaranggas dagiti armado a puersa ti estado ket agtultuloy a mangdidigra iti nalawa a kaawayan ken kadagiti syudad iti intero nga Ilocos-Cordillera. pammaneknek a saan a napudno ti rehimen nga US-Duterte nga ipatungpal ti deklarasyon na a ceasefire iti panawen ti epidemya ti Covid-19. Kabayatan a nakapauneg iti lockdown ti umili, nawaya ti AFP, PNP ken dagiti intel da nga agdakiwas kadagiti lugar. Saan a nagsardeng dagiti tropa ti militar nga agisayangkat kadagiti narungsot a combat operations, CMO-saywar ken intel operations iti intero a rehiyon. Iti uneg ti naideklara ti rehimen a lockdown wenna enhanced community quarantine (ECQ) iti intero a Luzon, istrikto a maparitan ti umili a rumuar kadagiti komunidad, ngem nawaya met dagiti militar nga agdakiwas a mangipapaay ti danag kadagiti umili gapu iti posibilidad a maakaran dagitoy ti Covid-19 ken dadduma pay a sakit.

Abra. Manipud pay laeng idi maudi a lawas ti Pebrero nagoperasyon ken idi ideklara ni Duterte ti unilateral ceasefire da ket nagpuesto dagiti tropa ti B Coy 24th IB iti kabalbalayan

kadagiti barangay ti Lat-ey, Buanao, Umap, Mataragan, Gacab, Duldulao ken Poblacion iti munisipyo ti Malibcong inggana iti agdama. Madisturbo ti umili iti rabii gapu iti rinabii a panagrikus dagiti nagpuesto a militar iti igid ti baryo. Nagbalin a perwisyo ti ipapaay da gapu ta makurangan ti umili iti bassit la ngaruden a bagas a kanen da, lalo ta maparitan da met a mapan kadagiti talon.

Iti panagoperasyon da, maparitan dagiti residente a mapan kabagal iti taltalon, ken agarup adda dagiti ilegal a tinanggel ken naimbestigar a nakataktak iti panangsango da iti trabaho da a ti maysa ditoy ket nakagapu iti panangkaan ti baka iti pagay dagiti kailian da ta saan na a dagus a naasikaso a sinimpa ti alad a napuoran.

Iti met munisipyo ti Lacub, nagoperasyon ti C Coy 24th IB iti Barangay Buneg ken Barangay Guinguinabang. Puersado a sinerrek ken tinakawan da ti suplay dagiti bunkers ti small-scale miners idiy Mt. Bugas a saklaw ti Barangay Guinguinabang. Adda met ti tinakaw ken pinarti dagiti soldado a baka idiy Mt. Bumurayok a nakapauneg

iti Barangay Buneg. Iti met Sityo Talampac, Barangay Pacoc, pinuoran dagiti militar ti alikamen ti minero. Pinuoran da ti nalawa a paset ti bambantay iti nagbaetan ti Malibcong ken

Lacub, a nakairamanan dagiti paset ti nursery ti National Greening Project (NGP). Marso 28 a sinubliyan manen ti C Coy a nagoperasyon iti Barangay Buneg.

Iti maikadua a paset ti Abril, simrek ti tallo a trak a nangilugan kadagiti tropa ti militar iti Barangay Vira ken Barangay Agsimao iti munisipyo ti Tineg. Simmaruno ti panangipatayab kadagiti helicopter a nagrikikus iti Barangay Agsimao ken kadagiti kabangibang a munisipyo ti Malibcong ken Lacub.

Kagiddan daytoy, simrek met ti operasyon a combat ken psywar ti 69th IB kadagiti munisipyo ti Pilar, Villaviciosa ken Luba. Kasta met a nagoperasyon ti militar iti Barangay Alangtin, Tubo idi umuna a lawas ti Abril.

Kalinga. Agtultuloy latta ti operasyon ti militar kadagiti munisipyo ti Pinukpuk, Balbalan, Pasil ken Lubuagan. Nakita ti presensya ti militar kadagiti barangay ti Limos, Baay, Allagua, Ballayangon, ken Apatan iti Pinukpuk; Barangay Mabaca, Barangay Buaya ken Barangay Ab-abaan met iti Balbalan; minas ti Batong Buhay a paset ti Barangay Balatoc iti Pasil, ken Barangay Western Uma iti Lubuagan.

Mountain Province. Saan latta nga agsarsardeng ti operasyon militar ti 54th IB ken pakat dagiti Community Support Program Teams kadagiti munisipyo ti Sagada, Besao, Bontoc ken Bauko.

Ilocos. Kadagiti munisipyo ti San Emilio, Salcedo, Santa Lucia ken Quirino iti Ilocos Sur, agtultuloy ti operasyon dagiti tropa ti 81st IB ken 69th IB. ✎



Ti Covid-19 lockdown ken ti panagtignay ti umili

Nakakaskas-ang ti kasasaad ti sistema ti pangpubliko a salun-at iti Pilipinas. Awan ti panangisakit iti umili ti bulok a sistema a panggimong nga iturturayan ti imperyalismo nga US ken dagiti lokal a kakumplot na nga apo't daga ken burgesya nga idadauloan tirehimen a Duterte. Pananggundaway, panangidadanes ken pananglipit iti karbengan dagiti marigrigat ti iyab-ablat da, a nalawag a makita iti tinawen a panangilatang da ti dakdakkal a badyet tapno ibayad iti gangannaet nga utang, iti militar ken pulis, ken impraistruktura a paggatgatasan dagiti burukrata. Nagbassitan ti badyet para iti salun-at, gapu ta impaima dan kadagiti pribado nga institusyon ti serbisyo medikal kas pagganansyaan. Ti rinuker a panangpataray ti agturturay a sistema ti ad-adda a nangibutaktak iti kinaawan ti kinasagana ken kinainutil ti pasista a rehimen a Duterte iti panangsango iti pandemya ti Covid-19.

Manipud Marso 17 a naiyulog ti *enhanced community quarantine* iti intero a Luzon, naapektaran ti panagbiag ti umili iti intero nga Ilocos-Cordillera. iti amin a tay-ak ti inaldaw a panagbiag ket nadisturbo ken naperwisyo. Ngem iti bangir na, awan wenno kurang ti addang ti gubyerno tapno masungbatan ti pannakaawan ti pastrek ken dadduma pay a kasapulan ti umili. Maregmeg a relief laeng ti maited, ken ti naikari a *social amelioration* ket napnuan kadagiti anomalya.

Iti Ilocos-Cordillera, sumagmamano laeng ti doctor iti tunggal probinsya, isunga adu a munisipyo ti awanan doctor dagiti Rural Health Unit (RHU). Iti kastoy, saan a nakakaskasdaaw nga awan wenno saan nga umanay ti serbisyo medikal ti reaksyunaryo a gubyerno kadagiti umili iti kaawayan. Adu a sulsulineka a baryo ti awan ti bukod a health center wenno no adda man ket awanan ti uray basaran a ramit medikal, agas ken manmano a mabisita ti doktor, midwife wenno nurse.

Epekto ti lockdown

Kangrunaan a riri ti umili ket ti panangparit kadakuada

nga umaway tapno asikasoen ti pagbiagan da. Tunggal rummuar da iti balay tapno mapan kadagiti talon ken uma ket masapul nga ipakada kadagiti opisyal ti barangay. Iti kastoy, saanen a naan-anay a mabantayan ti kasasaad dagiti mula. Uray ti panagapan iti bakir tapno aganup, agbirok ti uway ken agbirok ti dadduma a kasapulan iti bakir ket naiparit. Kadagiti sentro kas iti Tabuk City nga adu dagiti makitegged, narikna da a dagus ti epekto ti panagsardeng ti produksyon ken panagbiahe gapu ta naipagel ti panagbiahe. No adda



dagiti lumabas a lugan kadagiti *checkpoint* nga awan ti maipakita a papeles ket dagus a matiliw. Kadagiti lugar nga adda ti presensya ti militar, malimitaran ti nawaya a panaggaraw ti umili.

Maib-ibus ti abasto para iti balay a kas iti asin, sabon ken dadduma pay gapu ta saan a makaruar ti tattao a mapan gumatang kadagiti sentro. Isunga dagiti naikkan ti quarantine pass ti mapalubosan laeng a rumuar. ngem problema da met ti kinangina ti magatang kadagiti tiendaan ken groserya.

Ti puersado a panangpatalinaed iti umili iti pagtaengan ken panangitakder kadagiti *checkpoint* ket panaglabsing iti karbengan ti umili iti nawaya a panagbiag, a maiyarig iti saan a deklarado a martial law.

Agkurkurang a relief ken tulong medikal

Adayo a saan a makaanay iti kasapulan ti pamilya dagiti relief packs nga iwarwaras dagiti lokal a gubyerno. Iti Mountain Province, naipadamag a kaaduan kadagiti naiwaras kadagiti umili ket 1-2 kilo laeng ti bagas ken 3 a lata ti sardinas, 3 lata a corned beef, 1 lata a meatloaf, 5 a noodles, 3 pakete ti sabon ken maysa laeng a botelya ti zonrox ti naawat ti tunggal pamilya. Kuna ti umili, kurang pay nga abasto iti makalawas nga usar ti intero a pamilya ti kastoy a nagbassit a relief packs, lalo no adu ti kameng ti pamilya. Saan a makasupusop dagitoy a maiwarwaras para iti taraon ken usaren ti pamilya manipud naiyablat ti lockdown iti intero a Luzon idi Marso 15.

Saludsod iti adu nga umili no sadino ti napanan ti il-

aslastog ti rehimen ni Duterte nga adu a pondo, kas iti naiwarwaragawag a P275 bilyon nga alokasyon manipud iti nasyunal a badyet para kano iti panangsango iti Covid-19. Kasta met nga adda ti nailatang a P200 bilyon para iti subsidyo ti 18 milyon a *low-income households* nga apektado ti ECQ iti uneg ti linteg a Bayanihan to Heal as One Act a napirmaan idi Marso 30. Iti daytoy a programa, makaawat koma ti P5,000 ti tunggal pamilya a mannalon. Iti Cordillera, P1.3 bilyon ti nailatang para iti implementasyon ti Social Amelioration Program para iti 59,396 a benepisyaryo ti 4Ps, ken dumanon iti P5,500 ti maited. Daytoy a bilang ket 3% laeng ti kabuklan a populasyon iti Cordillera a nasurok 1,900,000. Ngem iti aktwal, ti P5,500 koma a maited ket agbalin laeng a P3,500 ti naawat ti dadduma a pamilya. Iti dadduma a munisipyo gapu ta kurang ti naawat da a pondo para iti SAP, nangala da ti pondo manipud iti *calamity fund* tapno laeng maikkan ti amin a pamilya iti saklaw ti munisipyo.

Basar kadagiti reklamo, maimatangan ti kinakumpikado ken kinabulok ti proseso a dalanen ti *validation* inggana iti panangiyawat. Iti adu a paset ti Mountain Province, pakasdaawan dagiti residente no kasano a naaramid ti listaan dagiti benepisyaryo idinto a saan met a nainterbyu dagiti pamilya iti tunggal barangay. Uray no nairaman iti mabalina a makaala dagiti pamilya ti OFW a saan a makapaw-it ti kuarta, senior citizens, tao nga adda ti *disability* na, agpaspasuso ken dagiti masakog, adu kadagitoy a natudo a grupo ket saan a makaawat

gapu iti saan a nagpapada atrato dagiti *validators*.

Gapu iti agkurkurang a tulong iti sango ti kumarkaro a krisis iti pagbiagan, adu nga umili ti mangibagbaga a “saan kami a matay iti sakit no di iti bisin.” Iti syudad ti Tabuk, addan dagiti naipadamag a kaso ti panagtakaw kadagiti grocery stores gapu iti kinaawan ti makan ken kuarta a panggatang ti taraon.

No adda man ti maipatulod nga agas, maysa inggana dua laeng a tabletas ti Paracetamol ti maiwaras iti tunggal pamilya. Iti dadduma a lugar, saan nga umanatap ti agas a maipatulod.


Panangsango ti umili iti pandemya ti Covid-19

Iti sango ti pandemya a Covid-19 ken ti kasaruno a panangiyablat ti lockdown iti intero a Luzon, nakita dagiti positibo a kapadasan ti umili iti panangpatibker ti panagkaykaysa ken pigsa. Babaen iti panagtinnulong, nabukel ti umili dagiti addang para iti panangipangato ti produksyon, panangisaknap ti impormasyon maipanggep iti nasao a virus, inggana iti panangiwanwan kadagiti naitakder a checkpoints.

Iti Kalinga, inpanawagan ti umili ti panangisardeng kadagiti operasyon militar gapu iti posibilidad nga agisaknap da ti Covid-19 ken

ti disturbo a maipaay kadagiti komunidad. Basar iti resolusyon nga inpila ti Local Government Unit ti probinsya a mangiparit iti panagserrek dagiti militar, inakem dagiti opisyal ti barangay, barangay tanod ken Barrio Health Workers (BHW) ti panangbantay kadagiti naitakder a barangay checkpoints kadagiti pagserrekan. Inpampusan da met laeng ti panangpartuat kadagiti face masks tapno adda usaren dagiti agbantay iti checkpoint ken dagiti umili. Uray dagiti CAFGU ket saan da a napalubosan nga agbantay kadagiti checkpoint. Iti dadduma a probinsya, nangipalkat dagiti opisyal ti barangay ti pakdaar a mangipalagip iti kondisyon ti lockdown kadagiti nagbebedden dagiti barangay, ken nabaelan ti umili a paritan ti panagserrek ti militar.

Iti dadduma a paset ti Cordillera, inusar ti umili ti tiempo ti lockdown tapno pairutan ti panagtinnulong iti panangpaadu ti taraon ken dadduma a kasapulan. Naipatungpal dagiti grupo ti alluyon para iti panagpaadu ti payaw ken panguma, panagmula iti mais, bukel, nateng, aba, kamote ken tabako. Kadagiti alluyon, ginundawayan dagiti mannalon ti panagtitiyon da tapno adalen dagiti pamuspusan iti panangpaadu ti taraon. Indauloan met dagiti kabataan ti preserbasyon dagiti lames a makalap iti karayan tapno agbalin a buggoong wenno ‘butong/balle-



tong' iti lokal a lenggwahe. Gapu ta awan ti gasolina para iti panang-kiskis iti irik, nagtinnulong dagiti kabataan ken kababaihan iti manwal a panagirik wenno 'taltag' ken panagbayo. Tapno maaddaan ti asukar, naipatungpal met ti grupo a panagdapil ti unas tapno agpartuat ti muscovado. Nagbalin a nalag-an dagitoy a trabaho iti produksyon gapu iti napigsa a panagtitinnulong ti umili.

Nagsisinnaranay met laeng ti umili tapno tulongan dagiti kakailian nga agkurang ti makan babaen iti panagpipinnadawat ti nateng ken panagbibinnulod ti pagay. Inlukat met ti sumagmamano nga adda ti naidulin a pagay ti apit da a pagbulodan ti kaaruba a nakaro nga agkurkurang iti bagas. Nagkinnoordina met dagiti munisipyo tapno agsisinnukat ti produkto ken mangilako iti dadduma a probinsya, kas iti panagsinnukat ti Paracelis ken Sadanga ti saba ken bukel iti Mountain Province.

Ti addang ti rebolusyonaryo a tignayan

Ti panangisayangkat dagiti yunit ti BHB kadagiti kampanya iti impormasyon maipanggep iti Covid-19 ken klinikang bayan, nabara nga inawat ti umili nga agkasapulan ti serbisyo medikal. Agtultuloy ti panangipatungpal dagiti istap medikal kadagiti serbisyo medikal ken kampanya iti panangipadanon ti impormasyon no ania ti Covid-19 ken kasano a tamingen dagiti tumataud a kadawyan a sakit ti umili babaen kadagiti pulong masa, pagiwarnak ken social media. Mairusrussuat dagitoy iti pannakitinnulong kadagiti organisasyon masa ken komite ti salun-at kadagiti baryo.

Manipud iti panangi plano inggana iti aktwal a panagirussuat, nairut a katinnulong dagiti yunit ti BHB dagiti kameng ti Sangay ti Partido iti Baryo, komite ti salun-at kadagiti rebolusyonaryo nga

organisasyon masa kas iti Pam-bansang Katipunan ng Magbubukid (PKM) ken Cordillera People's Democratic Front (CPDF). Dakkel met ti rebbengen dagiti naitakder a Komiteng Pangsulun-at iti Baryo (Barrio Health Committee wenno BHC) iti panangipakaammo iti umili, panangilawlawag maipanggep iti kasasaad pangsulun-at, inggana kadagiti teknikal a trabaho iti panawen ti serbisyo medikal.

Napardas ken aktibo nga inyaramid dagiti medik ti BHB ti panagcheck-up, panag-BP ken panag-acupuncture. Kagiddan met ditoy ti panangiyadal no ania ti Covid-19, ania ti nairut a silpo na daytoy iti agdama a bulok a sistema ken dagiti rumbeng nga aramiden tapno malabanan daytoy, kas iti panangpapigsa iti resistensya ti bagi ken ti panangpaadu iti produksyon ti taraon. Kasta met a nailawlawag ti kinapateg ti panagtignay ti umili tapno irupir dagiti rumbeng a serbisyo ken relief iti panawen ti lockdown.

Kadagitoy a serbisyo medikal, kaaduan kadagiti sakit nga inpakonsulta ti umili ket kadawyan nga uyek, panateng, ut-ot iti nadumaduma a paset ti bagi, dunor ken hypertension (nangato a presyon ti dara).

Inpatungpal met laeng dagiti yunit ti BHB dagiti panagadal tapno naun-uneq a maawatan ti umili ti maipanggep iti Covid-19 ken malabanan ti nakaro a panagdanag ken buteng iti intar da. Idi damo, inannatupan ti BHB ti social distancing kadagiti pulong masa, bayat nga ilawlawag no ania ti Covid-19. Iti maysa a munisipyo, dimmanon iti 300 katao ti naikkan ti panagadal iti las-ud ti dua a lawas. Nailawag kadagitoy a panagadal ti maipanggep iti quarantine. Nailawag a no awan ti kaso ti Covid-19 iti lugar ket maymayat latta nga ituloy ti tinnulong iti produksyon ti taraon lalo iti sango ti kumarkaro

a krisis ti makan a resulta ti lockdown gapu ta awan met ti peggad a maakaran. Inpanawagan iti masa nga ipangato ketdi ti produksyon ti babaen iti panangusar kadagiti nabaybay-an a talon, panaggarden ken panaguma para iti nateng. Natalmegan ti kinapateg ti panangpapigsa ti resistensya ti bagi tapno malabanan ti Covid-19 ken dadduma pay a sakit. Nakatulong dagitoy a panagadal tapno mabaawan ti nakaro a buteng ken danag ti umili gapu ta naammoan a mabalin a malabanan ti Covid-19 babaen iti panangpapigsa iti resistensya, panangpatalinaed ti sanitasyon ken husto a taraon. Nagyaman met dagiti BHW iti nayon a kaammoan maipanggep iti nasao a sakit, gapu ta uray isuda ket agkurkurang ti impormasyon a maipadpadanon ti gubyrno kadakuada lalo kadagiti sulsulineq a lugar.

Inggana iti agdama, agtultuloy ti naregta a panangilawlawag ti BHB maipanggep iti Covid-19 ken ti panangtarabay iti umili tapno ipatungpal dagiti kolektibo nga addang tapno risuten dagiti problema nga inbunga ti lockdown. Agtultuloy ti panawagan a saan nga umanay ti social distancing ken saan nga umannatop dagiti militarista nga addang a kas ti lockdown tapno mapaksiat ti Covid-19 ken dadduma a sakit, no di ti panangipaay ti husto a serbisyo ken prayoridad iti salun-at ken husto nga impormasyon, saan a pammutbuteng ti solusyon.

Nairut nga ipanpanawagan ti PKP ken BHB iti Ilocos-Cordillera ti panangpapigsa iti lokal a produksyon ti taraon ken aktibo nga agkaykaysa a panagtignay ti umili tapno irupir ti maiparbeng a tulong ken serbisyo iti insayangkat ti gubyrno a lockdown. Kasta met ti panangpapigsa kadagiti tradisyunal nga ugali iti panagtitinnulong ken panagsisinnaranay iti panawen ti krisis. ✎

Pannakamulat ken pannakilaban ti mangmangged a kababaihan

Pakasaritaan ni Ka Paula

Mangun-od ti wayawaya ti pagilian maibilang dagiti kababaihan babaen iti rebolusyonaryo a pannakilaban! Daytoy ti pinetpetan ni Ka Paula. Ni Ka Paula ket Nalabbaga a mannakigubat ti Nona del Rosario Command (NDRC)-BHB Ifugao. Sigud a mangmangged idi namulat ken nagtignay, inggana a nagkameng iti BHB idi 2012. Ti sumaganad ti pakasaritaan na.

“Simrekak kas maysa a mangmangged iti maysa a pabrika ti panty idiy syudad iti edad a 19. Kalkalpas ko laeng ti hayskul idi a panawen, gapu ta awan ti pinansya a mausar tapno agkolehiyoak isu a apanunot ko nga agrabaho.

Iti pabrika, dakami ti adda iti kaudian a proseso ti produksyon - ti panangimpake kadagiti produkto. Masapul a makupin, maikarton a iti sagsangadosena santo mapigketan ti sticker a nagduduma ti maris. Sangapulo a dosena ti kabatog ti maysa a tiket nga isu ti basaran ti natrabahoan ti maysa a mangmangged. Tallopolo (30) a tiket wenno 300 dosena ti kota ti maysa a mangmangged iti iti las-ud ti 7 oras ken 30 minuto a panagtrabaho, nailaksid ditoyen ti 30 minuto a break. Kayat na a saoen, kasapulan a makupin inggana a maikarton ti maysa a dosena iti uneg ti 1 minuto ken 50 segundo.

Idi a panawen, P280 tunggal aldaw ti minimum a sueldo ti maysa a mangmangged ngem gapu ta bar-baroak pay laeng, ti aw-awatek ket P187.50 tunggal aldaw. Tunggal katapusan ti bulan, ti makabulan a sueldo ket maikissay ti para iti SSS, Medicare ken PAG-IBIG a kabatog ti nasurok maysa aldaw a sueldok. Ti pananggato ti sueldo kas aprentis ket nakadependar iti kapardas nga agrabaho tapno madanon ti naikeddeng a kota. Kuna dagiti katrabahoak a nagbayag iti 20 inggana 25 a tawenen nga agrabtrabaho da idiy, gagangay a naparpartak da ta naruam dan iti kastoy a trabaho iti adu a tawen. Masansan a saanak a makadanon iti kota, isunga inaldaw a nalabbaga ti kolor ti card ko. Ti sistema ti panaggrado ket nalabbaga ti maris no 79% agpababa ti nadanon iti kota, asul no 80-99% ken berde no 100% agpangato ti nadanon. Isunga dimmanon pay iti lima a bulan sakbay a nadanon ko ti P200 nga inaldaw a sueldo.

Iti pabrika, istrikto da iti panaginspeksyon kadagiti usar ti tunggal mangmangged. Inggana iti panty ket itsek da ti tag ken mamarkaan kas pammaneknek a ginatang mi, saan a tinakaw iti uneg ti pabrika. Istrikto da met laeng iti oras. No lima laeng a minuto a naladaw iti serrek ket kagudua ti inaldaw a sueldo ti dagus a maikissay. No aglangan wenno ag-absent, kasapulan nga ipakaammo iti

kumpanya. No nairana nga awan ti maysa a mangmangged iti panawen ti panagsueldo ket inton sumaruno a tapus ti bulan nga agsueldo.

Gapu kadagiti kemikal a maus-usar iti panagaramid ti nylon a panty kasta met ti pino a fibers a malanglang-ab mi no agkupin, nagrugi ti panagkapsut ti resistensiak. Kimmuttongak ken naawananak ti ganas a mangan. Nagrugi met laeng ti minalem a gurigor ko. Ngem Paracetamol laeng met ti ited da iti klinika, numampay P100 ti binulan a maikissay iti sueldok para iti Medicare. Nadlaw met laeng dagiti katrabahoak ti panagkuttong ko. Gapu iti panagsakit ko, mano a daras a saan ko a naala ti sueldok. Iti panagpacheck-up ko, idiyen a nakita a napunnon ti napino a fibers ti tela ti barak, isunga marigatanak nga umanges. Gapu ditoy, naikkatak iti trabaho.

Iti met komunidad mi, nagbalin nga isyu ti kanayon a layus iti lugar. Naitakder ti organisasyon dagiti kababaihan tapno sangoen ti epekto ti layus kasta met a tapno makaala ti tulong. Adda dagiti kabagiak a nagbalin nga opisyal ti nasao nga organisasyon. Uray idi agrabtrabahoak, nagrugi ti pannakitugaw ko kadagiti innadal nga it-ited da iti organisasyon. Ditoy a nagrugi ti pannakamulat ko iti kasasaad dagiti mangmangged, a naisilpok a dagus iti aktwal a kapadasak iti uneg ti pabrika. Nagbalinak nga aktibo iti organisasyon ken nakipartisipar kadagiti tignay protesta. Timmulong met laeng ti organisasyon iti panangtaming iti salun-at ko.

Idi naikkatak iti trabaho, im-



paay ko ti sibubukel a panawen ko kas organisador iti komunidad mi bayat nga agpapaagasak. Manipud idin, nagtultuloyak a nagtignay iti intar ti nakurapay a kababaihan kadagiti komunidad. Napabaknang ti kapadasak ken napasingkedan ti pangngeddeng ko iti kinahusto ti pannakidangadang.

2009 idi immuna a simrekak kas exposuree iti maysa a larangan gerilya iti kaaw-awayan. Iti las-ud ti mano a bulan, nakitak ti kinapat-eg ti partisipasyon ti kababaihan iti armado a pannakidangadang. Immuneg ti kaammoak kasilpo iti kasasaad ti kababaihan ken kinapat-eg ti panangwayawaya iti kababaihan babaen iti demokratiko

a rebolusyon ti umili. Nakitak ti na-biag a partisipasyon ti kababaihan iti amin a tay-ak ti trabaho ti Hukbo – manipud iti trabaho a pampulitika, teknikal inggana iti trabaho a pangmilitar.

Idi 2011 ket natiliwak. Ngem gapu ta awan met ti ikaso da, nawayaan kami a dagus. Kalpasan ti makatawen ket nagkamengak iti BHB.

Iti uneg ti pito a tawen ko kas Hukbo, adun ti napasarak a kinarigat, panagadyas, krisis ken problema ngem amin dagitoy ket nagbalin a karit tapno ad-adda a tumibker ti pangngeddeng ko nga agrebolusyon. Dagiti kapadasak iti uneg ti pabrika ti nangpatadem

iti panagamiris ken nangpatibker iti panangiggem kadagiti prinsipyo kas kameng ti Partido ken kas man-nakigubat. Inaldaw a mapaspasingkedan ti panirigak nga awan ti dadduma a mangpugsat iti kawar vti pannakaadipen ti dasig a mang-mangged ken mannalon no di ti pannakilaok iti armado a pannakidangadang nga agturong iti pan-agbalbaliw ti gimong. Iti balligi ti demokratiko a rebolusyon ti umili, maitakder ti maysa a sosyalista a gimong no sadino a magun-od dagiti mangmangged, kababaihan ken intero nga umili a magungund-awayan ken maidadaneg ti pang-gimong nga hustisya ken pudno a wayawaya.” ✎

Kampanya a panagpasurrender ti militar, kunkondenaren ti umili

Iti panagitintinnag kadagiti flyers ti AFP maipanggep iti panagpasurrender ket kinundenar ti umili ti Ilocos ken Cordillera. Napuskol latta ti rupa ti AFP nga ipatpatungpal ti kampanya a pan-agpasurrender iti laksid ti narikut a panangsango ti umili ti pandemya ti coronavirus disease (Covid)-19 iti intero a pagilian.

Iti Sagada, Mountain Province, nasdaaw dagiti residente iti panangitinnag ti helicopter kadagiti leaflets a naibungon iti plastic a napakuyogan ti candy idi April 12. Ti pagarup a relief weno tulong ti gubyerno ket awan kaiska-iskan a propaganda nga agpanpanawagan ti panagpasurrender ken malisyoso a mangpadpadakes kadagiti progresibo nga organisasyon a tumultulong a mangiwaras ti relief goods kadagiti komunidad ti Baguio, La Trinidad ken Benguet.

Nagapit ti adu a reaksyon daytoy nga addang ti AFP. Kaaduan ti nasuron gapu ta panagpasurrender linaon dagitoy a flyers. Adu dagiti

nakapungtot a nangiyebkas iti social media gapu iti daytoy a panangsayang iti pondo ti umili, kasta met nga adda dagiti agdanag gapu iti posibilidad a kontaminado ti virus ti Covid-19 ti nasao a papel. Inpanawagan met ti dadduma ti panangimbestigar ken panangdusa kadagiti opisyal ken soldado a responsable iti daytoy a naaramid. Inrupir da a daytoy ket paset ti panangbutbuteng ken panaglabing iti karbengan ti umili.

Kuna met ti dadduma, “Ti pakausaran na laeng ti daytoy a papel ket pang-ilo.”

Parehas a kinaluko met ti inaramid ti 24th IB kadagiti munisipyo ti Malibcong ken Lacub, Abra. Nangitinnag ti dua a helicopter kadagiti kapada a flyers nga addaan ti saggaysa a candy kada bungon idi Abril 14. Nasuron ti adu nga umili gapu ditoy.

“Imbag pay no makan ti intinnag da, adda pay koma serbi na,” nakuna ti dadduma a residente. Kinundenar da met

laeng daytoy kas awan serbi a pananggastos iti kuarta ti mabisbisinan nga umili. Imbes a relief ti itulod da isu ti kasapulan unay ti umili, saywar latta ti iyaramid dagitoy a mabaybayadan a soldado. Iti panangirussuat kadagitoy a nagastos ken inuulbod a kampanya ti panagpasurrender iti tengnga ti krisis iti salun-at, awan ti dadduma a kamkamakamen ti militar no di ti agtultuloy a panagakup ti minilmilyon a pondo ti E-CLIP manipud iti peke a panagpasurrender. Nalawag nga ipakpakita ti AFP ti kinaawan ti pudno a panangisakit da iti pagimbagan ti umili nga agpaspasueldo kadakuada.

Ti gasto iti tunggal oras a panagtayab ti maysa a helicopter ti militar ket P112,050.00. Iti las-ud ti innem nga oras a panagtayab ti maysa a helicopter, dumanon ti P672,300.00, a mabalina koma a naited babaen iti sag-P5,000 a social amelioration iti 134 a pamilya.” ✎



Simon "Ka Filiw" Naogsan
Tagapagsarita ti CPDF

Ti anibersaryo ti Cordillera People's Democratic Front (CPDF) – 31 a tawen ti naregget a pannakidangang ken agtultuloy nga umab-abante!

Iti tengnga ti nasaknap a panagatake ti COVID 19 iti sangalubongan, selebraran tayo itatta a 23 ti Marso ti Maika-31 nga Anibersaryo ti Cordillera People's Democratic Front (CPDF). Tallopulo ket maysa a tawen ti naglabas manipud idi Marso 23, 1989, balligi a naangay ti umuna nga organisasyonal a kumperensya idiyay Balbalan, Kalinga a dinar-ayan dagiti delegado manipud kadagiti nadumaduma nga agkakaalyado nga organisasyon masa, lider-masa a panglakayen ken alyado iti rehiyon. Ditoy a taripnong, naaprobaran ti Sangapulog a Punto a Programa (10 Point-Program) ken dadduma pay a napapateg a basaran a dokumento. Nabutosan ken naipuesto dagiti rehiyunal ken probinsyal a konseho na.

Iti taray ti mano a tawen, lim-mawa ken simmaknap dagiti nagkameng ken tsapter ti CPDF. Dagiti obhetibo a kasasaad a naparnuay manipud kadagiti natipon ken nagtutuon nga epekto idi panawen ken kalpasan ti nairteng a pannakidangang kontra iti Chico Hydro-Electric Mega Dams, panag-logging ti Cellophil Resources Corporation ken ti napairteng a militarisasyon a naawagan nga "Operation Chumanchil" ket nangibunga iti paborable ken nagammatan a kasasaad a nakapagpaadu iti naitakder a tsapter ti CPDF manipud Village Council of Leaders inggana iti Municipal Council of Leaders. Dagiti dangran ti naulpit a militarisasyon, ken ti naibunga daytoy a panagpatay kadagiti lider masa ken dadduma pay a labsing ti karbengan tao ken ti nairut a kontrol ti estado iti propaganda ket saan na nalapdan ti panaglapan ti umili ken determinasyon a mangirupir ti umili iti karbengan da iti bukod a ken demokrasya. Imbes ket gimmil-ayab ti apoy ti panagsupyat ken dangadang a nangibunga iti panagadu dagiti kabataan ken mangmangged iti lokalidad ken syudad a simmampa iti NPA.

Bunga ti klaro a programa a

naibatay iti kongkreto a kasasaad ti Cordillera, linya ti politika ti bukod a pangngeddeng ken demokrasya, inpatungpal dagiti tsapter tunggal tukad ken saklaw daytoy basar iti kabaelan da.

Rambakan tayo ti anibersaryo itatta a tawen, saan a kas iti kadawyan a taripnong no di ket babaen iti panaglagom ken panagadaw kadagaiti adal ti panangidaulo tayo kadagiti komunidad, tribu ken sektors iti nagun-odan ken saan a nagun-odan iti napalabas a tawen. Kangrunaan, nakasarang kadatayo iti agdama ti problema a COVID 19 ken ti panawagan iti nasken a panangsango iti krisis babaen iti kolektibo a wagas. Nasken nga itultuloy nga ipatungpal dagiti kampanya kontra iti COVID 19 a mangap-apektar iti umili.

Dagiti adal a naadaw manipud kadagiti nabaknang a kapadasan tayo manipud kadagiti militante a dangadang iti napalpalabas nga addaan kapada a biag ken patay a kasasaad kas iti dangadang laban iti Chico dams ken ken pasismo ken militarisasyon, kontra gubat tribu a kampanya, kampanya kontra kadagiti natural ken aramid-tao a kalamidad, ken ti agtultuloy a kampanya iti panagpaadu iti

makan ket agserbi kas nabaknang a puonan a pagalaan ti wagas a mausar tapno maipagballigi tayo ti panangsango daytoy a krisis.

Iti amin a kabaelan, ipatungpal tayo ti aduan ken nasaknap a kampanya tapno ipaadal ti COVID 19. Buklen ti nair-irut a panagkaykaysa dagiti amin nga agkaalyado a rebolusyonaryo nga organisasyon masa tapno kolektibo nga iyabante dagiti pangsalun-at ken sanitasyon a kampanya. Aktibo a patignayen dagiti grupo ken komite ti salun-at iti rebbengen da tapno malapdan ti panagwaras ti Covid-19 bayat nga itultuloy tayo a salakniban ti karbengan ken pagsayaatan ti umili. Naipakita ti rebolusyonaryo a pak-aistoryaan a nagun-od dagiti balligi babaen iti kolektibo a panagtignay.

Ti nakurang a panagtaming ti salun-at dagiti umili ti Cordillera ket simumulagat a realidad. Kinapudno na, mabilbilang iti ramay dagiti medical professionals nga agserserbi kadagiti municipal health units, banag a mangipaidam kadatayo iti serbisyo medikal no sadino ket paggastosan ti nangina. Dagiti kinakasapulan a medisina, basaran nga instrumento pang-medikal ket agkurkurang, banag a masansan a mangidurduron kadtayo a mangaramat kadagiti tradisyunal a mulmula a herbal. Awan ti manamnama a pudno a tulong manipud iti maysa a kurap ken pasista a rehimen a US-Duterte ken dagiti paspasurot na a mangipangpangruna iti panangpunno iti bulsa da imbes a maited iti umili nga agkasapulan. Ti agdama a krisis a COVID 19 ti nangibutaktak ti

. . . suruten iti panid 11



Covid 19: Sintomas ti nakaro a sakit ti malakolonyal ken malapyudal a gimong

Part 2

Ania ti nadanon ti Covid-19 iti Ilocos ken Cordillera?

Iti umuna a kaso ti Covid-19 iti Cordillera ket naipadamag idi Marso 14. Isuna ket maysa a seaman a taga-Abra. Kalpasan ti makabulan, addan ti 15 a kaso iti Baguio City ken saggatlo a kaso kadagiti probinsya ti Benguet ken Abra. Naaddaan met laeng ti maysa a kaso iti Ifugao idi Abril 25. Iti maudi a paset ti Abril ket 42 ti nakumpirma a kaso iti Cordillera, mairaman ti 15 a mangmangged iti salun-at.

Iti Ilocos Region ket dimmanon iti 61 ti kumpirmado a kaso idi Abril 20. Maysa laeng ti kaso iti Ilocos Sur, 2 iti Ilocos Norte, bayat a 15 met iti La Union, 43 iti Pangasinan.

Ania ti kasasaad ti salun-at iti Pilipinas tapno paksiaten ti Covid-19?

Iti panagwaras ti Covid-19, makita dagiti nakaro a pagkurangan ti sistema ti salun-at iti Pilipinas:

Ti badyet ti Research Institute for Tropical Medicine (RITM) a maysa kadagiti kangrunaan nga ospital a mangsangsango iti Covid-19 ket nakissayan manipud iti P263 milyon idi 2019 iti P115 milyon laengen itatta a 2020. Kastoy met laeng ti napasamak iti badyet ti Philippine General Hospital.

Iti aktwal, saan tayo a masigurado no maitudo ti amin a naakaran ti Covid-19 iti pagilian tayo, gapu ta limitado unay ti maar-aramid a testing. Agkamkamakam ti gobyerno iti panangdanon iti target a mangirusuat ti 30,000 a tests iti inaldaw. Adda dagiti rehiyon iti pagilian nga awan ti bukod a testing center. Idiay Vietnam, maiyar-aramid ti 110,000 a test iti inaldaw bayat nga idiay Malaysia ket nasurok 50,000 ti tests ti maaramid iti inaldaw.

Manipud 2016 inggana 2019 pay laeng, agtultuloy a makiskissayan ti badyet para kadagiti programa nga adda ti pakainangan iti panangtaming iti salun-at ti umili (public health). Saan laeng a kadagiti napalabas a tawen a kiskissayan ti estado ti badyet para iti serbisyo ti salun-at. Ti panagtipid kadagiti panggimong a serbisyo, mairaman ti salun-at, ket nabayagen a diktar ti International Monetary Fund-World Bank ken ti dadduma pay nga imperyalista nga institusyon nga ag-

papautang iti Pilipinas.

Iti panagbettak ti pandemya a Covid-19, naibuktak dagiti pagkurangan ti pangpubliko a serbisyo iti salun-at – agkurkurang iti pondo, pasilidad, ken mangmangged iti salun-at. Karkaro nga agkurkurang iti serbisyo a pangsalun-at ti nalawa a kaaw-awayan. Iti Manila ken kadagiti dadakkel a syudad ken kadagiti sentro ti nakaipasdekan dagiti ospital ken klinika. Mayorya kadagitoy ket pribado wenno mapatpataray kas negosyo.

Ti panangisegurado iti serbisyo a pangsalun-at para iti umili ket saan a prayoridad ti estado. Mas ti interes na ket kissayan ti pondo iti salun-at ken usaren iti panangpondo iti militar. Saan met laeng nga interes ti estado a pagtalinaeden dagiti mangmangged ti salun-at iti Pilipinas gapu ta dakdakkel ti pastrek nga ipatulod da iti pagilian kas OFW.

Kas iti kabuklan a sistema a malakolonyal ken malapyudal, nabayagen nga adda iti krisis ti sistema ti salun-at iti Pilipinas. Nabayagen nga adu a Pilipino ti agsaksakit ken matmatay gapu iti kinakurang ti serbisyo a pangsalun-at. Gapu ta kasapulan nga ibaw-ing ti kadakkelan ti rekursu a pangsalun-at para iti panangsango iti Covid-19, karkaro nga agkurkurang ti sigud a nagbassit a pangpubliko a serbisyo a pangsalun-at para iti dadduma a sakit.

Kasano a husto a sangoen ti sakit a Covid-19?

Ti pudno nga interes ti rehimen a Duterte ket usaren ti krisis ti Covid-19 tapno maitultuloy ti panangipatangpal kadagiti pasista a panggep na; kagiddan na ket interes met laeng ni Duterte a pagkurakotan dagiti pondo a mailatang iti panangsango ti pandemya. Gapu ta kastoy ti interes ti agturturay a dasig, maikunkundisyon ti panunot ti umili a husto ti panangiyablat ti lockdown ken nakasanggir kadagiti pang-indibidwal nga addang (kas iti panangusar ti face mask, panagbuggo ti ima ken panagtalinaed iti balay) ti panangliklik iti Covid-19.

Agkurkurang dagiti addang ti estado tapno papigsaen ti sistema ti salun-at ken sarapaen ti epekto ti pandemya iti pagbiagan ti umili. Maisupadi daytoy iti ar-aramiden ti dadduma a pagilian a nangipakita ti nasayaat a panangkontrol iti Covid-19. Maibilang

ditoy ti Venezuela, Cuba ken Vietnam. Sigud a dakkel ti panangipateg dagitoy a pagilian iti panangisigurado kadagiti serbisyo a pangpubliko para iti umili da. Ti salun-at ket maysa kadagiti prayoridad nga ik-ikkan dagitoy a pagilian ti rekurso.

Idiay Venezuela, naimobilisa ti 13,000 a duktor tapno bisitaen ti tunggal pamilya kadagiti pagtaengan da. Dua milyon a tests ti naaramid. Malaksid kadagiti addang a pangsalun-at, naisigurado met laeng ti naan-anay a suporta para iti pagbiagan ti umili. Nangiwaras da ti food boxes iti 7 milyon a Venezuelan. Estado ti nangited ti sueldo dagiti mangmanged. Nangited da pay ti special government bonus. Dagus nga indeklara ti estado ti panangsuspende iti panangsingir ti abang iti balay ken pautang iti las-ud ti 6 a bulan ken maiparit a maikkat ti umili iti trabaho. Ad-adu pay koma ti maaramid ti Venezuela ngem ti US\$ 7 bilyon a pondo na daytoy ket inpagel ti imperyalismo a US a mairuar iti bangko.

Idiay Cuba, dagus a napatignay dagiti sigud a naipuesto a doktor iti tunggal baryo. Nairussuat dagiti health hearing kadagiti komunidad ken pabrika tapno

maikkan ti naan-anay nga impormasyon ti amin nga umili. Ti Cuba met laeng ti nangiyun-una iti panangiruar ti agas kontra-Covid nga Interferon Alpha 2B. Daytoy ket maysa a klase ti nangato a protina a mangpapigsa iti resistensya ti bagi tapno malabanan ti Covid-19.

Idiay Vietnam, sakbay pay laeng a maaddaan ti umuna a kaso, nairugin ti panagsagana ken panangsuspende iti panagserrek dagiti tao a naggapu iti Wuhan, China. Napardas a naikabil iti quarantine dagiti naitudo a grupo nga addaan ti Covid-19. Dagiti komunidad a naitudo nga adda ti panagadu ti kaso ti Covid-19 ket dagus a mapatulodan ti nayon a mangmanged iti salun-at.

Iti pagilian tayo, ipakpakita ti rebolusyonaryo a tignayan ti husto a panangsango iti Covid-19. Aktibo dagiti yunit ti Hukbo iti pannakitinnulong kadagiti lokal a Sangay ti Partido, milisyang bayan ken organisasyon masa. Naregta ti panangirussuat kadagiti panagadal maipanggep iti Covid-19 ken dagiti medical check-up. Naregta met laeng dagiti kampanya ti timpuyog a pangtignay para iti produksyon ti taraon ken panangirupir kadagiti nayon a panggimong a serbisyo. ✎

. . . Ti anibersaryo . . . manipud iti panid 9

nakaro a kinakurap ken palalo nga inutil a programa a pangsalun-at ti gubyrno ni Duterte. Ti militarista a wagas a panangsango ti gubyrno ni Duterte iti krisis, a mangipangpangruna iti panangpondo iti makinarya ti militar ken polis ket ad-adda a mangbutbuteng iti umili imbes a mapalag-anan ti danag da.

Malaksid pay iti kontra COVID a kampanya, kasapulan nga adawen tayo ti adal manipud kadagiti nabayag ken agtultuloy a kampanya iti produksyon iti makan babaen iti bukod a pigsa ken kabaelan. Isunga, nasken a gupgopen dagiti nagun-odan iti panangitandudo ken ad-adda a panagpaduras kadagiti nainsigudan a praktika iti mutual labor exchange kas iti ub-ubbo, alluyon, dang-as ken dadduma pay a praktika iti panawen dagiti kalamidad wenno nasken a kasapulan kas iti fetel (panawen ti kinakurang ti makan) no sadinno a sumanggir iti kolektibo a pakinakem ti panagsisinnaranay tapno

masiguradu a maaddaan ti amin iti taraon. Kabayatan na, nasken nga ipursigi ti dangadang a panangsingir iti reaksyonaryo a gubyrno ni Duterte para iti nasisita a relief. Iti tengnga ti agdama a krisis a COVID 19, kasapulan a singirin ken isiguradu a maited ti umdas a relief ken ti naikari a social amelioration funds para iti naruy a masa. Masingir pay ti gubyrno ni Duterte tapno gammatan dagiti naidiaya a debt moratorium dagiti credit institusyon ken pugsaten dagiti diktar ti imperialista a polisiya a neoliberal a nangipribatista ti serbisyo a pangsalun-at ken dadduma pay a serbisyo a panggimong.

Suportaran mi ti singasing dagiti umili a Pilipino a nayunan ti badyet para iti serbisyo pangsalun-at, libre a serbisyo medikal, panangpadur-as ken panangitakder kadagiti nayon a pangpubliko nga ospital ken klinika iti kaaw-awayan, nalaka a medisina, edukasyon ken treyning para kadagiti ad-adu

pay a mangmanged pangsalun-at, research centers tapno mataming dagiti epidemya iti agdama ken iti masakbayan.

Kasta met a supsuportaran mi dagiti frontliners para iti nayon a sweldo, nayon a puersa a maikkan iti naan-anay a hazard funds, kinakasapulan a personal protective equipment ken dadduma pay a ramit pangsalun-at, as-asideg a pagnaedan, pasilidad iti transportasyon ken dadduma pay a kasapulan.

Taktakderan mi latta ti panggeddeng a ti laeng maysa a gubyrno a pudno a mangibagi iti umili a mangipangruna iti pangangipaay ti napudno a serbisyo a panggimong iti masa ti addaan kabaelan a mangpaksiat kadagiti sakit. Ken daytoy ket magun-od laeng no maipagballigi ti umili a Pilipino ti nailian demokratiko a rebolusyon ken maitakder ti baro a rebolusyonaryo a gubyrno ti umili nga agturong iti panangibangon ti sosyalista nga ekonomya. ✎



Pablaak

Panangsaludo ken ni Kadua a Julius Giron

Komiteng Tagapagpaganap - Komite Sentral
Partido Komunista ti Pilipinas
20 Marso 2020

Iti linged ti sipngget sakbay ti parbangon ti Marso 13 rinaut ken pinatay dagiti berdugo a gamat ti pasista nga estado ni Kadua a Julius Giron ken dua pay a kadua na iti Baguio City.

Ni Kadua a Julius ket agpapaimbag manipud iti nakaro a sakit nga acute pancreatitis a timmaud kenkuana idi Hulyo 2019, nangdadael iti kidney na ken nangiduron nga agpaagas iti syudad. Ti panangpatay da kenkuana ket awan duadua a maysa manen a kaso ti extrajudicial execution, politikal a pampapatay, ken panangpatay a maysa a hors d'combat a labasing kadagiti internasyunal a makatao a linteg, ken paset ti nadara a kampanya ti pampapatay ti pasista a rehimeng Duterte ken AFP-PNP kadagiti rebolusyonaryo ken dadduma pay a lumablaba.

Ni Kadua a Julius nga am-ammo iti rebolusyonaryo nga intar kas Kadua nga Alban, Amian, Nars, Kiko ket agtawen ti 69. Agladingit ti Partido, Bagong Hukbong Bayan, dagiti alyado nga organisasyon ti National Democratic Front of the Philippines ken ti rebolusyonaryo a masa. Kasta met nga agladingit tayo iti kadua a duktor ken ti kadua da nga inraman da iti awanan asi a pampapatay.

Nadagsen a konkondenaren ti Partido Komunista ti Pilipinas ti pasista a kinaulpit, panangabusu ken arogansya ti mawaw iti dara a rehimeng Duterte ken mersenaryo nga AFP-PNP. Awanan respeto a linabsing dagiti bukod da a linteg, dagiti internasyunal a paman-tayan ken makatao a linteg, kasta met ti katulagan ti CARHRIHL a pirmado ti GPH ken NDFP gapu iti agam-amangaw nga ambisyon a patibkeren ti aso-aso nga estado ken lemlesen iti bukod da a dara dagiti agtar-tarigagay ti pundamental a panagbalbaliw ti gimong.

Ni kaanuman ket saan a matungpal ti rinuker a panggep da. Dagiti pasista a kinaulpit ken panangidadanens ket lallalo laeng a mangpabara iti unget dagiti



maidadanens ken marigrigat. Iti tunggal Kadua nga Alban a patayen da, rinibu pay nga anak ti umili ti mamulat ken tumakder tapno itultuloy ti panaglaban agingga a maparmek ti panagari dagiti pasista, aso-aso ken reaksyonaryo.

Agladingit tayo gapu ta dakkel a pukaw iti Partido ken rebolusyon ni Kadua nga Alban. Kagiddan, salsaludoan tayo isuna gapu kadagiti naisang-sangayan a naaramidan na iti

atiddog ken napudno a panagserbi iti proletaryado ken umili. Padayawan tayo isuna kas pagwadan a komunista a mangidadaulo, kadre ken mannakigubat nga umakem ti krusyal a papel iti panangiyabante ti tignayan ken panangrimbaw ti Partido kadagiti kinarigat. Gapu iti nasilnag a rekord na, nabotosan ti Maikadua a Kongreso ti Partido kas maysa kadagiti maikadua a mangidadaulo ken kameng ti Komite Sentral, Kawanihang Pampulitika ken Komiteng Tagapagpaganap ti Komite Sentral.

Ni Kadua nga Alban ket nalaing a lider ti Cordillera ken Amianan a Luzon. Addaan dara ng Igorot ken nangipaay ti dakkel a paset ti rebolusyonaryo a panangadal ken praktika iti usapin ken pannakidangadang ti umili a minority. Inusar na a tarabay ti Marxista-Leninista-Maoista a teorya ken linya ti Partido iti usapin ti nailian, demokratiko a rebolusyon ti umili, ken naunday a gubat ti umili iti panagsukisok ken panangawat kadagiti partikular a galad ken kasapulan ti gimong ken rebolusyon iti Cordillera. Inikkan ti partikular nga atensyon dagiti inadaw nga adal ti Partdo manipud iti kapadasan ti nasapa a tukad ti pannakigubat a gerilya ken panaglaban iti pasista a diktadura nga US-Marcos ken ti panangiyaplikar dagitoy iti panangilawag iti

lina ti integrado wenna amin a benneg a panangiya-bante ti demokratiko a rebolusyon ti umili ken pannakidangadang para iti bukod a pangngeddeng ti umili a minorya ti Cordillera. Iti kasta, naragpat ti tignayan iti rehiyon ti awan pay kapada na a panaglawa, pigs a ken panangidaulo iti umili ti Cordillera ken ti pannakidangadang ti Cordillera ket nagbalin a narimbaw a puersa iti pannakilaban dagiti nailian a minorya, panakidangadang nga antidiktadura ken intero a pannakidangadang ti nailian a demokratiko.

Maibilang ni Kadua nga Alban iti nabileg a hukbo ti aktibista nga inyanak ti Unang Sigwa ti 1970 a nangipasaknap ti tignayan a propaganda iti intero a pagilian ken nangiharas (naghasik) ti bin-i ti armado a pannakidangadang iti nadumaduma a rehiyon. Kas iti dadduma pay a rinubo a kabataan nga estudyante, dagus a nagsubli iti rehiyon a dimmakelan na(kinagisan) tapno ipasaknap ti propaganda ti nailian demokratiko, mangitakder kadagiti balangay ti Kabataang Makabayan ken dadduma pay a progresibo nga organisasyon masa, ken mangirugi ti napasnek (puspusan) a trabaho a propaganda, panagorganisa ken panangpatignay iti intar ti masa nga anak ling-et ken dadduma pay a demokratiko a dasig iti syudad ken kaaw-awayan. Idi marekrut iti Partido ti 1971, umakem kas kalihim ti Komite ti Partido iti syudad ti Baguio ken Direktor ti Rehiyunal a Kawanihan iti Unyon ti Mangmangged.

Manipud 1973, nagkonsentra isuna iti pannakidangadang iti kaaw-awayan. Nagbalin a kalihim ti Sangay ti Partido iti Platun ti BHB iti Montañaosa (Ifugao-Benguet-Mountain Province) ken Opisyal a Pampulitika ti Platun. Nagbalin a kameng ti Komite a Tagapagpaganap ti Partido iti Rehiyon ti IMP ken maibilang kadagiti nangiyuna iti panagpalawa dagiti sona a gerilya, panagorganisa dagiti minorya ti Cordillera, panagbukel dagiti armado a yunit pampropaganda ti hukbong bayan ken panangirugi ti pannakidangadang a gerilya.

Idi 1974, natiliw isuna ken naulpit a pinarigat dagiti tortyurer ti pasista a diktadura. Iti sango ti nairteng a parigat ken peggad, saan a nadayyeg ti prinsipyo ken kinapudno na iti Partido ken dagiti rebolusyonaryo a prinsipyo. Ni kaanuman ket saan a nagduadua iti komitment iti rebolusyon ken umili. Iti sumagmama no a tawen a pannakaibalud, nagbalin a kangrunaan a lider dagiti balud a politikal a natured a nangituloy ti panaglaban, nangitransporma kadagiti balud kas isk-welaan, pagpandayan ken sentro ti protesta ken panakilaban.

Nakalibas isuna idi 1979, dagus a nagsubli iti kaaw-awayan, ken direkta a limmaok iti komprehensibo a panagabante ken panagpigs a ti pannakidangadang ti Cordillera. Indauloan na ti Komite ti Probinsya ti Kalinga idi dimmanon ti kairtengan ti armado ken saan

nga armado a pannakidangadang iti mananggagam a proyekto a Chico Dam ti pasista a diktadura. Nagbalin a kameng ti Komite a Tagapagpaganap ti Komite ti Rehiyon ti IMP (Ilocos-Montañaosa-Pangasinan) ken kameng ti Komisyon iti Amianan a Luzon.

Ti uppat a kadakkel ti distrito ti larangan a gerilya iti Cordillera, nga addaan saggaysa a platun nga armado a yunit propaganda ket naregta a limmawa iti wagas a paallon-allon iti tulong ken duron ti nabileg a dalluyon dagiti protesta ken pannakidangadang a masa laban iti Chico Dam, Cellophil ken nailian a panangidadanes, ken laban iti pasista a diktadura. Nasaklaw ti armado a pannakidangadang ti amin a probinsya, simmaknap ken masansan dagiti taktikal nga opensiba ti hukbong bayan, pimmartak ti panangitaktader dagiti baro a platun ken iskwad bunga ti panagadu ti armas manipud kadagiti taktikal nga opensiba. Limmawa ken pimmigsa dagiti organisasyon masa, dagiti antipyudal a pannakilaban, panagorganisa ken panagpatignay laban iti nailian a panangidadanes ken nadumaduma pay a langa ti kampanya ken pannakidangadang a masa. Ken panagbukel dagiti lokal nga organo ken politikal a bileg. Iti nadumaduma a saklaw ken tukad, limmawa ken pimmigsa dagiti rebolusyonaryo ken progresibo a puersa ken pannakidangadang babaen iti managparnuay ken aduan a benneg a kombinasyon dagiti armado ken saan nga armado, ilegal, malaligal ken ligal a langa ti organisasyon ken pannakidangadang. Inbuangay ti Cordillera People's Democratic Front kas komprehensibo a rebolusyonaryo a nagkaykaysa a prente ti umili ti minorya para iti nailian a demokrasya ken karbengan iti bukod a pangngeddeng.

Iti maika-9 a Plenum ti Komite Sentral nabotosan ni Kadua nga Alban kas regular a kameng ti Komite Sentral. Nagbalin a kalihim ti Komite ti Rehiyon ti Cordillera idi 1986 ken maikadua a mangidadaulo ti Komisyon iti Amianan a Luzon idi 1987. Indauloan na ti panaglaban iti pananggudua ti grupo a Balweg-Molina-Ortega ken dagiti kampanya da a mangsugsog ti kontrarebolusyonaryo a lokalismo iti intar ti masa a minorya laban iti Partido ken hukbo, napasas a naibutaktak ti grupo iti kamali a linya da ken galad idi simmuko iti reaksyonaryo a gobyerno ken nagbalin a mabaybayadan a paramilitar ti AFP.

Iti maika-10 a Plenum ti Komite Sentral timmakder ni Kadua nga Alban para kadagiti basaran a rebolusyonaryo a prinsipyo ti Partido ken Maikadua a Naindaklan a Tignayan a Panagilinteg, laban iti rebisyonismo, kannigid ken kannawan nga oportunidad, ken dadduma pay a nakaro a panagsiasi. Nabotosan kas kameng ti Kawanihang Pampulitika ken Komisyon Militar bayat nga umak-akem ti rebbengen kas mangidadaulo ti Komisyon iti Amianan a Luzon.

Indauloan na dagiti organisasyon ti Partido iti Amianan a Luzon iti napasnek (puspusan) a panangdillaw ken panangilinteg iti nakaro a pagkurangan ken pagkapuyan ken iti narigat a panangpabaro't pigsa manipud iti dadakkel a pannakadadael ken panagatras bayat nga agsalaknib laban iti todo gera ti aso-aso a rehimeng Ramos ken todo a panangsabotahe ken pananggudua dagiti kontrarebolusyonaryo a traydor a makastrek iti daulo ti Partido, hukbo ken NDFP. Napaay dagiti atake manipud iti ruar ken iti uneg nga agkalkalikagum a naan-anay a maparmek ti Partido ken rebolusyon. Nangabaroanan ti regta ti Partido ken dagiti rebolusyonaryo a puersa numanpay agtultuloy agingga iti agdama ti panangpasubli iti dati a saklaw ken pigsa.

Iti maika-11 a Plenum ti Komite Sentral nabotosan kas kameng ti Komiteng Tagapagpaganap ti Komite Sentral ken nangipatungpal ti napapateg a rebbengen iti nailian a panangidaulo. Iti daytoy a rebbengen, indauloan na ti panangsegurado iti panangsalaknib ken panagtutipon manen dagiti sentral nga organo ti Partido idi pokusan ti atake ti kabusor. Nangruna pay, umakem isuna ti kangrunaan a papel ti koordinasyon, panagsagana ken panagisayangkat ti maikadua a Kongreso ti Partido a lalo a nangpatibker iti panagkaykaysa ken takder ti Partido kadagiti basaran a rebolusyonaryo a prinsipyo ken iti pangkabuklan a linya ti demokratiko a rebolusyon ti umili babaen iti naunday a gubat ti umili. Binigbig ti Maikadua a Kongreso ti Partido ken inikkan ti ad-adda pay a duron ti panagpadur-as ken promosyon ti dakkel a bilang dagiti kadre a kabataan ken kabanbanuagan pay iti nadumaduma a saklaw ken larangan ti pannakidangadang. Lalo a pinasingkedan daytoy ti Partido para iti panangipursige iti dana ti armado a rebolusyon iti sango ti total war ti pasista, aso-aso ken reaksyonaryo a rehimeng US-Duterte ken nabannuar a panangitag-ay ti nalabbaga a bandera ti proletaryo a rebolusyon iti panawen ti transisyon agturong iti baro a pigsa ti sangalubongan a rebolusyona sosyalista.

Iti panawen dagiti narigat a pannubok, pinaneknekan ti Kadua nga Alban ti naimpusoan a kinapudno ken dedikasyon iti Partido ken rebolusyon. Iti dadakkel nga usapin kanayon a mulat nga ik-ikkan ti kangatoan a panangipateg dagiti rebolusyonaryo a prinsipyo, ti panagtalek ken pannakikaykaysa iti nalawa a masa, ti panangitandudo iti panangidaulo ken panagkaykaysa ti Partido, ken ti optimismo iti naraniag a masakbayan para iti rebolusyon ken umili. Aginggana iti panagkaro ti sakit na, ti kanayon a nangnangruna iti panunot na ket makasubli a dagus iti rebbengen ken makatulong iti pannakidangadang ti dasig ken umili.

Naawan man ni Kadua nga Alban, naindaklan ti

patawid na nga ehemplo ken dagiti adal. Ipateg tayo ti lagip na ken natibker a pagnaen ti proletaryo a rebolusyonaryo a dana.

Agbiag ni lagip ni Kadua nga Alban!

Agbiag ti Partido!

Agbiag ti demokratiko a rebolusyon ti umili! ✎

. . . Panangpadayaw . . . manipud iti panid 15

Pilipinas idi 1971 ken umakem kadagiti kangrunaan a responsibilidad. Nagserbi a kakuyog ti Trade Union Bureau ken nagpartisipar iti organisasyon ti Northern Luzon Regional Party Organization. Nadutokan kas kameng ti staff ti Instructor's Bureau ti CPP iti babaen ti Education Department. Nagbalin a tim lider ti armado a yunit propaganda idia Ifugao. Nangisuro ti Political Officer iti Bagong Hukbong Bayan idia Isabela para iti rehiyonal ken nasyunal a panagpalaw.

Idi ilegal nga inarestar isuna nga awan ti warrant idi nasapa a paset ti martial law ni Marcos, pisikal ken mental a tinortyu isuna babaen iti electric shock wenna panangkuryente ken panangitudok iti truth serum. Nagtalinaed a natibker ken narimbawan ti tortyur gapu iti natibker a komitment iti rebolusyonaryo a tignayan ti umili ken nauneg a panangipateg iti umili. Kalpasan na, nakalibas isuna iti pagbaludan.

Dagus a simmilpo iti rebolusyonaryo a tignayan a nangato ti gagar a labanan ti manangidadanes ken mananggundaway a malakolonyal ken malapyudal nga agar-ari a sistema ken ti pasista a diktadura a Marcos. Manipud idin, immakem ti nangato a responsibilidad iti PKP, BHB ken NDF. Ti dadduma a kakadua iti tukad ti Komite Sentral ti PKP ti kamayatan a mangipresentar kadagiti responsibilidad ken naaramidan na kas komunista a kadre ken rebolusyonaryo a mannakigubat manipud 1970s.

Ited ko daytoy a panangidaton ken ni Kadua Julius kas madagdagus a deklarasyon a panangpadayaw kenkuana iti umadani a pumpon na. Mangnamnama tayo iti otorisado ken nayon nga impormasyon a panangideklara ti Komite Sentral ti PKP. Nakabasar ti deklarasyon ko kadagiti impormasyon a dagus a naurnong manipud kadagiti gagayem ken kakabagyanna.

Natalgedak a no adu ti mairuar a mas komprehensibo a deklarasyon ti umiso nga otoridad ti PKP iti kinatan-ok a Kadua a Julius kas napudno a rebolusyonaryo ken komunista a mannakigubat ket maibannawag ken narimrimat a mangted inspirasyon iti agdama a henerasyon dagiti rebolusyonaryo a kadre ken umili ken masakbayan nga henerasyon tapno gun-oden ti naan-anay a balligi ti demokratiko a rebolusyon ti umili agturong iti sosyalista a rebolusyon. ✎



Pablaak

Panangpadayaw ken ni Ka Julius Giron

Jose Maria Sison

Kas mangidadaulo iti pannakaitakder ti Partido Komunista ti Pilipinas ken Chief Political Consultant ti National Democratic Front of the Philippines, padayawak ti nalabbaga a panangsaludo ni Kadua a Julius Soriano Giron ken iyebkas ti kangatoan a panangpadayaw ken pangiwaragawag iti kinabanuar ken iti atid-dog a pakasaritaan kas komunista a lider ken rebolusyonaryo a mannakigubat iti gubat ti umili a pilipino para iti nailian a wayawaya ken demokrasya.

Ipadanon ko ti naimpusoan a pannakipag-ladingit iti pamilya ken iti amin a kakadua na, kakabagyan ken gagayyem. Makipagladingitak iti ipupusay na ken naragsak nga ipannakkel ti tungpal-biag ken nabunga a panagserbi na iti umili iti nabaknang a panagtignay ken pannakidangadang para iti nailian ken panggimong a pannakawayawaya manipud iti gangannaet a monopolyo kapitalismo, pyudalismo ken burukrata kapitalismo.

Ni Kadua a Julius ket nagserbi iti umili iti kasayaatan ken ingge't kabaelan na ken babaen iti pinakapagwadan a pamuspusan, natay kas bannuar ken agnanayon a sibibiag iti puso ken panunot ti umili ken iti agtultuloy a demokratiko a rebolusyon ti umili nga addaan sosyalista a pers-pektiba. Ti pannakatay na iti ima dagiti armado a pasurot dagiti traydor, tiranikal, manangpukaw ti puli, kurap ken ulbod a rehimen Duterte ket mangpaunget iti umili ken mangiduron nga ipi-nget ti rebolusyonaryo a pannakidangadang da.

Idi immay dagiti pasista a mangpatay kenkuana, matmatureg daytoy iti pagigiyanan na a balay no sadi-no nga agpapaimbag manipud iti sakit a resulta ti panaglakai ken kinaanep. Kinaulbod a kabaelan na pay a lumaban nga ibagbaga ti reaksyonaryo a gobyerno ken militar. Napapatay isuna kadua dagiti doktor a ni Dra. Maria Lourdes Tangco na, ken maysa a taguyod a kas kenkuana ket nariing laengen babaen iti tanugtog iti ridaw ken adu a putok dagiti mamapatay (murderer).

Daytoy a pammapatay ket nalawag a pananglabing iti International Humanitarian Law (Geneva Convention) ken GRP_NDFP Comprehensive Agreement on Human Rights and International Humanitarian Law ken uray iti partikular a GRP-NDFP Joint Agreement on Safety and Immunity Guarantees aglalo ta ni Kadua a

Julius ket maysa a political consultant ti NDFP iti GRP-NDFP a negosasyon iti kappia. Rumbeng ken kinakasapulan daytoy para kadagiti organisasyon iti karbengan tao, dagiti sumupsuporta iti kappia ken mangmangged iti salun-at nga ikkan ti atensyon ti nasao a pammapatay ken ikkan ti maiparbeng a panangrespeto ken panangpadayaw kadagiti biktima ti naringgas a rehimen.



Kas kaniak, idi kinaubbing ken iti panawen ti pangbasa na ti elementarya, ni Kadua a Julius ket relihiyoso kas iti nanang na ken nagserbi kas sakristan kadagiti Katoliko a padi. Iti high school, nalaing ken mannakilangen a tao, ken adu ti gagayyem na. Natulugading gapu ta nalaing isuna ken adda talento iti panagkanta ken panagsala. Nalaing met isuna iti numero ken arapaap nga agbalin nga inhinyero. Nagbasa iti kurso nga Engineering iti University of the Philippines idiy Baguio ngem nalpas na laeng ti dua a tawen gapu iti nadagsen a responsibilidad kas mangidadaulo nga aktibista.

Nagkameng iti Kabataang Makabayan idi 1970 ken produkto ti First Quarter Storm idi 1970.

Indauloan na ti KM Baguio City. Iti panawen ti FQS, kanayon na a pamulatan ken ikkan inspirasyon dagiti agprotesta nga umili babaen iti panangiyebkas ti daniw ni Amado Hernandez a “Kung Tuyo Na ang Luha Mo, Aking Bayan” a kaandingay ti saniweng nga “Ang Gabing Mapanglaw.” Timmulong a nangitakder ti Samahan ng mga Anak Pawis (SaAnPa) idiy Baguio City idi 1970. Nagbalin a naisangsangayan nga aktibista ti nailian demokratiko a tignayan idi naigammulo iti panagorganisa ti mangmangged ti transportasyon, enerhiya ken sektor ti minasan.

Nagbalin a kameng ti Partido Komunista ti

. . . suruten iti panid 14

Kasasaad iti Covid

Pinutar dagiti kabataan

*Ti biag mi ditoy ili,
Narigat kasasaad mi
Ngem uray pay nu kastoy kami
Naragsak panagbiag mi*

*Serbisyo a medikal
Saan ketdi a militar
Ta isuda't mangidadaulo
Mangbutbuteng ti tattao*

*Awan pulos ti patinggana
Ti ibagbaga da a problema
Radio man wenno social media
COVID latta pagsasaritaan da*

*Rigat dagiti umili
Gibusan iti rebolusyon
Panagserbi dagiti kakadua
Umili ket agyamyamanda*

*Gapu iti virus a simmangbay
Ti biag mi ket saan a rumang-ay
Kumarkaro pay a rumigrigat
Ti sitwasyon mi a marigrigat*

*Umili mulat tayo
Karbengan ilaban a husto
Rebolusyon ti sungbat
Iti mananggundaway a gubyerno*

*Awan umno a tulong da
Korapsyon awan patinggana
Kwarta't umili napanda imbulsa
Sigud met nga aramid da*

